



Sisimiut Kangerlussuullu akornanni qallersugaanngitsumik aqqusineramik sanaartornermi Namminersornerullutik Oqartussanit inatsisitigut aningaasartuutissat pisariallit tamaasa ingerlatsinermi aningaasartuutit kommuunip nammineq isumagissappagit qulakkeerneqarnissaannut Naalackersuisut peqquneqarnissaannik Inatsisartut aalajangiiffissaattut siunnersuut.

(Inatsisartutnut ilaasortaq Anders Olsen, Siumut)

(Siullermeerneqarnera)

Qujanaq Inatsisartunut ilaasortaq Anders Olsen siunnersuummut.

Qularutissaanngilaq, takornarissat amerliartornerisa inuiaqatigiit aningaasarsiornerannut qaffassaataasunut ilaassasut, taamaasiornikkullu nunatsinni pigissaarnerulerneq atugarissaarnerulerlerlu qulakkeerlugu.

Kisiannili pingaartuuvoq, eqqarsarluarnissarput, aningaasaliiffigisassatta eqqortuunissaannut ingammik nunatta karsianit aningaasaliiniartilluta. Inuiaqatigiit aningaasaqarneranut siuariaataasussanut aningaasaliinissagut sammisittariaqarpagut. Iluaqutaanngilaq, piffinnut aningaasarpassuarnik pilliuteqaralarutta, aningaasat utersinnaanngippata.

Taamalu aamma isikkoqarpoq Sisimiut Kangerlussuullu akornanni aqquserniornissaq maannakkuugallartumik.

Nalunaarusiat misissuinerillu maannakkumut suliaasimasut isikkoqalersippaat, aqqusernup taamaattup inuiaqatigiit aningaasaqarniarneranut pitsaasumik kinguneqassasoq. Tunngaviit taamaattut uatsinnut pingaaruteqarput. Soorunami taamaamat tapersernarpoq, kommunimilli aallartinneqarsimasut aqqusinermut aningaasartuutaasussat misissorneqarneri utaqqimaartariaqarpagut, ukiup naanerani naammassisussatut naatsorsuutigineqartut.

Taassuma saniatigut pingaartuuvoq, naatsorsueqqinnissaq, maannakkut ilisimaneqalermat, Air Greenland ilimanarluinnartoq imarpik ikaarlugu Kangerlussuarmut aalajangersimasumik ingerlaartitaqartannginnissaa. Aammattaaq pissusissamisoorpoq sukumiisumik misissussallugu suliffeqarfeqarnerisooq nunanik allaneersunik, Kangerlussuarmut timmisartuussisarnissaminnik soqutiginnittunik aammalu aqqusinniorneq taamaaliornissamut apeqqutaassanersoq.

Taassumali akornusertariaqanngilaa, inatsisissamik piareersaalluta aallartinnissarput, pisinnaatitsisussamik, Namminersorlutik Oqartussat tassunga sanaartukkamut nunataanilu aqqusinernek allanik sananissamut aningaasartuuteqarnissaat.

Demokraatinut pingaartuuvoq, suliap taassuma ingerlanneqarnissaa, imaassinnaavormi, siunissami nunataani piffinniluunniit allani Sisimiut Kangerlussuullu eqqaaniunngitsoq aqquserniornissamik pisariaqartitsisoqarsinnaammat. Inatsimmili allassimasariaqarpoq, misissueqqissaarnerit naatsorsuinerillu



saqqummiunneqartuaannassasut, qanoq aqqusernit taamaattut inuiaqatigiinnut aningaasaqarnikkut kinguneqarsinnaanersut imaasillugu, uagut Inatsisartuni pilersaarutit isummerfigisinnaassagatsigit ersarissunik tunngavissaqarluta.

Siunnersuutip uuma akuerineratigut imaluunniit Naalackersuisut allannguutissatut siunnersuutaat imaanngilaq isumaqartoq, aqqusineq Sisimiut Kangerlussuullu akornanni piviusunngussasoq. Akuersineq ima kinguneqaannartussaavoq, inatsisiliortoqartoq, Namminersorlutik Oqartussat aqqusineq aningaasaliiffigisinnaagaat – aamma aqqusernit nunataaniittut – Inatsisartuni amerlanerussuteqartut aalajangissappata tassunga aningaasaliinissamut akuersiniarlutik. Tamanna pingaartuuvoq eqqaamassallugu.

Taamatut oqaaseqaatitalerlugu siunnersuut Sanaartornermut ataatsimiititaliami suliareqqitassanngorlugu innersuunneqarpoq.